



DEO OPTIMO MAX.  
UNI ET TRINO.

VIRGINI DEIPARÆ, ET S. LUCÆ  
Orthodoxorum Medicorum Patrono.

QUÆSTIO MEDICA,

QUODLIBETARIIS DISPUTATIONIBUS  
*manè discutienda, in Scholis Medicorum, die Jovis duodecimo  
Decembris, anni M. DCC. XXXVII.*

M. LUDOVICO-CLAUDIO BOURDELIN,  
Regiæ Scientiarum Academiæ Socio, Doctore  
Medico & Facultatis Decano, Præside.

*An Hypochondriaci morbi remedium Equitatio.*

I.



AFFECTIO Hypochondriaca, græcis *ὑποχονδριακὸς νόσος*, &  
*εὐχολίης* nuncupata, Morbus est, ut mirabilis varietate symptomatum,  
sic eorumdem pertinaci diuturnitate infamis. Hunc, multiformi  
mutabilitate, Proteum, repullulandi facilitate, Hydram, malorum,  
quæ exhalat, multitudine, Pandoræ Pyxidem verè dixeris.  
A mente ad corpus, à corpore ad mentem, pari, miserâque proclivitate  
traducitur. Nec solos invadit eos qui ventri serviunt, sed sobrios etiam.  
Rarò in stolidos, sæpius in ingeniosos sævit. Quò scilicet quis est in studiis

A

occupatior, quò altorum meditationum capacior, eò & pronior est in hunc morbum. Quas utinam miseras, ut æquiori jure, sic litterarum publicæque rei minore damno, otiosus tantum & hebes quilibet pateretur! Huic malo, ansam remotamque causam, præbuerunt non semel, immoderata Latitæ, Mæstitia supra fidem urgens, Venus immodica, longi Diætæ errores, violentiora, diutiusque protracta Exercitia, verbo dicam, ferè quidquid in rebus non-naturalibus nimium est. Affectum Hypochondriacum crucem ægri, Medici tormentum, Artis nonnunquam opprobrium, à veterum Melancholiâ gradu tantum diversum, causis verò, symptomatis, & curatione, cum Melancholiâ prorsus eundem, descripseris potius quam definieris; tam multiplicibus se prodit, signis, dicam, an morbis? Quorum ferè omnium larvam induit, gerit personam. Pueros nunquam, rarò adolescentes, adultos, constantisque, aut provectæ etiam ætatis homines sæpius aggreditur, si præsertim morbum invitarit, nigro, hirsuto, sicco gracilique corpori inditum à natura, acre penetransque ingenium. In primis initiis levior est, nec medelæ omnino expers; diuturnitate ingravescit hique refractarius, vetustate aliquando lethalis evadit, Apoplexiâ tunc, Paralyti, Epilepsiâ, Maniâ, aliisque pessimi moris, & ferè immedicabilibus, morbis solitus terminari. Quæ partes morbo tentantur sunt præsertim Abdominis viscera, Præcordia, & cum suis involueris Cerebrum: licet, nec extremis quidem corporis partibus, hac peste omnino vacare fas sit. Stomachum nunc male habet Cardialgia, nunc vellicat succutitque crebra, austere, falsæ, acrisque pituitæ vomitio. Modò eundem rugitus vexant, modò tendunt flatu. Hypochondrium utrumque, frequentius tamen sinistrum, molestam patitur distensionem; sub ventriculo immanis pulsatio persequitur. Eadem loca vexat identidem, nec unus, nec fixus, sed multiplex & vagus, lancinansque dolor. Spasmo interim contractum intestinorum canalem percurrunt, non sine Borborygmis & murmure, crebri status, & ad convulsas usque fauces ascendens, easque strangulans, hysterics tamen mulieribus, quàm viris hypochondriacis familiarior, Globos. Est ubi relictis infimi ventris visceribus, aut iis etiam intactis, Thoracis arcem causa morbi impetat, paribus, sinon dirioribus malis, in ægrum deservitura. Quæ si respirationi famulantes musculos, Pulmonisque Parenchyma occupet, constrictionis angustięque in his partibus sensum infert, respirationem facit difficilem, & levissimum ad motum laboriosam: Nonnunquam & verum Asthma exprimit. Si, Thoracem intus investientes, membranas obsideat, ipsis, Mediastinoque præsertim, dolorem mordacissimum, nunc eidem loco pertinaciter hærentem, nunc ad scapulas usque protensum imprimit. Si in Cor, fontem fontemque vitæ lues sese insinuaverit, Tremorem, Palpitationem, Oppressionem insignem, Spirituum deliquia, Lipothymiamque secum importat, Syncopi, brevissimo, & omnium maxime præcipiti ad mortem, morbo adeo similem, ut ea correptus æger, ultimum sibi adesse diem certo certius existimet. Quid si capitis arcem animæque sedem invaserit hostis infensissimus? Væ! misero ægrotanti caligant oculi, vertiginem patiuntur, tinnunt aures, susurrant, sibilant importunè. Rigida spasmo lingua, animæque imperio regi jam indocilis, hæret, blæsa fit, balbutit, instar Paralyticorum. Quoties nimia siccitate exhaustis faucibus, convulsisque tum Pharyngis, tum maxillæ utriusque musculis, ademptam sibi aut saltem interceptam man-

3

dendi glutindique facultatem æger suspiravit ! Quoties, aut sæviente ultra modum, humanamque patientiam, Odontalgia, tantum in rabiem non actus, aut eo dolore, quem à suâ immutabilitate Clavum vocant, cerebri membranas lancinante atque dilaniante, vitam desperans æger, tot malorum terminum, mortem exoptavit. At nec extremas externalque corporis partes sua non manent infortunia ; quas & dolores vagi pererrant, & Spasmus convellit, & hebetat cum formicationis quodam sensu stupor, & nocturnus humectat inquietatque sudor, & tumor inflat, manè quàm vesperti protuberantior, & hydropico, si impressi digiti vestigium retineret, omnino similis. Tot variis, formidolosum æque ac formidabilem, symptomatis affectum, aut venturum indicat, aut præsentem comitatur, urinis, copiosis, aqueis & crudis, non ignorabilis, & temporarius Diabetes, signum morbi Pathognomonicum. Fœlices tamen in suâ infœlicitate hypochondriacos, si tot corporis doloribus, mentis ægritudo, malorum cumulus, non accederet. At quantum corpori, tantum animæ, virium diceres detrahi. Miseram igitur, fractamque morbo mentem tyrannicè opprimunt, quotquot ferè singulos homines, partitâ Tyrannide, perturbant affectus. Hinc incertus animi, modi nescius, solâque constans in levitate quilibet hypochondriacus, ab amore ad odium, ab audaciâ ad formidinem, à fiducia ad suspicionem, à sanitatis opinione ad morbi cuiusvis imaginariam possessionem, ab immodicâ lætitiâ ad extremam mortificationem, & vicissim, aut futili, aut nullâ de causâ, dicto citius, solet transire. Denique, pro humanitatis calamitatem & dedecus ! Quem virum de rebus seriis graviter & ornate dicentem audiisti, quem vidisti modò amplissima negotia cum dignitate sustententem, quem intuits es per media ruentem animosè pericula, hunc, si eum afflaverit teter pessimi morbi halitus, miraberis tuta omnia muliebriter timentem, pueriliter ejulantem non sine stupore audies, inconditaque vociferantem, aut insulse etiam ridentem, aliquando miserabere. Hæc mala, magnam partem *spasmodica*, facit sanguis spissior & lentior, indeque pendens anormis & exlex, spirituum animalium, in nervos influxus.

## I I.

**M**ORBI hypochondriaci causam, cum veteribus, Lienem esse, ne existimos. Immeritum Viscus, necdum satis cogniti usus, culpares injuit. Male etiam, à veteribus excogitatam, absurdamque, (ignoscant priscorum Medicinæ Heroum manes) nescio quam viscerum Antipraxiam, Hypochondriacæ affectionis causam assignaturus, à debita oblivionis tenebris revocare satageres. Non rectius mali hujus reum hepar feceris. Viscus illud, si in hypochondriacis dolet, dolet *sympathicè*, ut plurimum. Nec æquius, cum, Oribasii sectatore, Hgimoro, affectus hypochondriaci causam in ventriculo semper esse querendam asserueris. Fomittem quidem malo præbet stomachus, illius sedes & victima, sæpè non causa. Quot enim valente stomacho, cibosque & appetente & probe digerente, hypochondriacis interim morbis divexantur. In reliqui corporis ærumnarum partem si venit stomachus, istud infortunii non aliunde, quam à viciato succo gastrico, repetendum est. Succus verò gastrici vitium, undenam, nisi à depravato, ejusdem succi promptuario,

sanguine, deduxeris? Tardè quòd digerat alimenta hypochondriaci hominis ventriculus, facit, dubio procul, visceris fibrarum laxior tonus, digestionisque opificum, salivæ ac liquoris gastrici, vis hebetior, à spissiore pigroque sanguine oriunda. Liber enim purusque stomachi vasa permeet sanguis, fluidus idem, succoque laudabili dives ad glandulas appellat, suis fibris elater stabit, sua, digestionem promoventibus succis, aderit *energia*, sua, redibit ventriculo, naturalis digerendi facultas. Nec rancidum quid & nidorosum olebit in posterum, eructans æger, nec amara falsaque evomet, nec miseri continuo madebit os sputo, nec Borborygmis turbata obmurmurabunt intestina, nec flatibus, ad dolorem, intumescunt. Tor symptomata læsam alimentorum coctionem aut comitantia, aut sequentia, quid esset causæ cur lentiori tardiorique sanguini non imputarentur, cum, acribus, calidis, attenuantibusque sanguinem medicaminibus, non rarò cedant? Modo non dispare, Pectoris Capitisque functionibus, dira lues incommodat. Quid enim arguunt, cum constrictionis angustięque sensu, spirandi ingens difficultas, mentiturque Asthma, nisi gementia sub nimio spissioris sanguinis pondere, respirationis organa? Quid indicat, qui Mediastinum scapulasque mordet, accerrimus dolor, nisi distenta, turgente pigroque sanguine, minima harum partium vasa? Nec aliud suadent cordis Tremor, Palpitatio, Oppressio, veræque æmula Syncopes Lipothymia, quàm oppletum & propè suffocatum hærente spissioque sanguine, ac proinde, statis temporum intervallis, dilatarì liberè constringique, impotentem, cordis muscolum. Similis sunt prolapisie, oculorum caligo & vertigo, aurium tinnitus, susurri, sibila. Quæ in languentibus & diuturno morbo fractis atque emaciatis, aquosiori quidem dilutiorique sanguini rectè tribuuntur, in hypochondriacis verò qui, cætera, aliquando valent, nonnunquam & obesi sunt, soli, sanguinis redundantis corpulentiorisque, lentiori ac pigritiæ accepta debent referri. Nec ab eadem radice non pullulant hæsitantis, blæxæ, balbutientisque linguæ spasmi, convulsorum, maxillæ utriusque & Pharyngis, muscutorum ad mandendum glutendumque impotentia, & quæcunque convulsiva sunt hujus morbi accidentia, hystericiis æque mulieribus, ac hominibus hypochondriacis, familiaria. Utrobique scilicet, sexum dempseris, par morbus est; Utroque in sexu, ad convulsionis negotium non dispar conferunt symbolum lutulentus & iners sanguis, nativæque suæ puritatis & normæ obliti spiritus animales. Qui ad mentis rationisque nutum non jam reguntur, sed ad morbi arbitrium turbantur, modòque torpent elangues, modò exleges effrænique hùc & illùc prorumpunt. Hinc in hypochondriacis mira velocque unius animi motus cum altero commutatio. Hinc subitus æquè, distoque citior, convulsivorum præsertim symptomatum, accessus recessusque. Hinc non expertes spasmii Ritus pariter ac Fletus. Ex eo tandem fonte scaturiunt quæcunque externas extremasque corporis partes, facto quasi diluvio, inundant symptomata, nocturni sudores, aquam sub cutem effusam imitatus tumor, gradientes formicas stupor æmulans, convulsivi muscutorum motus, cadaverum frigori frigus non absumile, exilissimi pulsus ultima debilitas, totius corporis languor. His omnibus, vix circumagi sanguinem, quibusdamque in partibus omnino hærare, spiritus vero animales nunc languere contra naturam, nunc insolito motu cieri, hosque, idcirco, regimine, illum calcare indigere, palam est.

**E**QUITATIONIS ab ingenuis hominibus, Magnatibus, Principibus Regibusque nunquam non excoltae, & in deliciis habitae, nobilitatem praedicant alii. Manifesta illius, tum belli tum pacis tempore, commoda, ut par est, extollant. Nos, medicam hujus exercitationis utilitatem, & in attenuando spissiore sanguine, instaurandaeque alimentorum digestionis efficaciam, praefertim laudamus. Equitatio, ut roborando juvenili corpori, sic languenti resarciendo, sanandaeque hypochondriacae inprimis aegritudini, apprimè utilis est. Quo jucundissimo remedio sanitatem amisam recipere si cui cordi est, is equum sibi comparet pedibus valentem firmumque, patientem frangi, oris non durum, nec ungue nec dente formidandum; non morosum, sed facilem; non suspiciosum timidumve, sed animosum; non indomitum, sed mitem, strenuum tamen, & ad ea quae sessor postulaverit audenda & facienda habilem ac promptum. Malè siquidem convenirent difficilis hypochondriacus, equisque morosior; suspicacem herum terterer, suspiciosi, umbraeque timidi animalis inquietudo; ab incipiendâ demum aut continuandâ equitatione, ungue vel dente metuendi equi pessima indoles, meticulosum equitem detereret. Equi non unus incessus: immo quadruplex numeratur, & pro variâ pedum alternatione & motione, modò Gradarius, Tolutarius modò, Succussator aliàs, aliàs Cursor equus nuncupatur. Inter ambulandum, unius lateris anteriorem alteriusque posteriorem pedem, & vicissim, sed diversis temporibus, alternatimque attollit ac demittit Gradarius. Succussator ille dicitur equus, qui eosdem quos Gradarius, sed iisdem temporibus, pedes movet. Tolutarii, terram simul deserit simulque repetit, utraque, ejusdem lateris, ungula; ita tamen, ut ultra antiqui vestigium, posticus pes, longè protendatur. Hinc nascitur grata illa, in totum gradientibus equis, virque longissima, brevi temporis spatio, consiciendâ aptissima, crurum pedumque glomeratio. Currendi facturus initium Cursor equus, vires primò recolligit suas, coxisque innixus validissimè, & elatâ simul, curvatâ utriusque anterioris tibiae, calce utraque, non tam graditur, quam salit antrorsum, posteriore utroque pede eundem motum sic imituro celeriter, ut necdum ad terram reductis primis pedibus, libratum pennis alitem diceret, terram postremi pedes relinquant. Sunt & aliae ignobiles duae incessus species, mixtae quidem & à prioribus degeneres, senioque aut labore confectorum equorum propriae. Harum altera, inordinato, celeri tamen, pedum jactu Tolutarii equi gressum male refert Effertisque & longâ fractis succussaturâ ac gestatione jumentis, usitata, gallicè *Entre-pas*, vel *Traquenard* dicitur. Alteram, enervium Vetedorum propriam, incessus speciem, quâ scilicet anterioribus pedibus Cursorem equum, posterioribus aut Succussorem, aut Tolutarium indecorè imitatur caballus, Galli *l'Aubin* vocant. Stratum in equum non prius infiliat Hypochondriacus, quàm ipsi de apparatu & ornatu equi constiterit. Prudentia siquidem est attentè inspicere an bene cum equi ore frænum, cum dorso ephippium conveniant. Laxiora ne sint an strictiora, quae sellam equo alligant, cingula; Quorum prius equitis ascensui & firmitati, posterius equi respirationi morusque libertati officeret.



Hæc dum examinat eques, lævo equi humero sese applicet, ne aut cervix propiorem incautumque eum, anteriore calce, aut ventri proximum, posteriore ungulâ feriat, alicujus incommodi impatiens, caballus. His perpenlis habena lora duo componat, iisque & equi jubâ, prope armum, lævâ simul apprehensis manu, dextrâ, sinistro submitrat pedi *spedem*, cui insistens, eâdemque manu mox arrepto sellæ posteriore arcu, in ephippium sese alacer immittat. In equi apparatus curiosius inspicere, ut coalescensuri equitis prudentiæ fuit, sic artis est, equo insidentem eum, corpus ita componere, ut recto, libero tamen capite, & inter utramque equi auticulam directâ oculorum acie, inflexa, in ipsis cubituum articulis, brachia corpori molliter adhæreant, & dextrâ manu virgam, habenam sinistrâ tenente, ad illa, naturali positurâ descendant, retrorsum ferantur humeri, hocque situ ampliata quodammodo Thoracis arcâ, retrorsum etiam inflexâ parum spinâ dorsî, & rotato introsum, ephippiique limbum utrumque arcû stringente utroque femore, ita pendeant ejusdem positionis participes tibiæ, ut altero pedis extremo paulò demissior talus, equi etiam ventri propior paulò fiat. Tandem mobilibus, pro re natâ, cæteris corporis partibus, nates & coxas, quidlibet saltando calcitrando-ve molliatur equus, sellæ fundo immobiles hæreere & quasi conglutinari, experientiæ, equestrisque peritiæ & firmitudinis apex est. Horum omnium gnarus, & diligens, quantum fieri poterit, observator Hypochondriacus, si non equo, at saltem Equitationi, spei plenus, curandum se committat. Quis enim ab innumeris hujus exercitationis motibus & successibus, salutarem corporis alterationem medelamque non speraverit? Nunc scilicet rectâ gradiendum currendum-ve est, nunc dextrorsum flectendus equus, nunc vertendus sinistrorsum, nunc retrorsum agendus. Modò, in ascendendo clivo, reddenda, ut aiunt, manus est, laxatisque habenæ loris, equus sibi quadantenus permittendus, qui mox in descendendo, terraâis iisdem, erit sustinendus. Est ubi crurum, quæ aliàs immobilia esse decet, adjumento, devium monere equum, lentè gradientem, poppyfmate, in cursum, saltumque etiam, si res ita postulaverit, hortari; inquietum, duriorè voce increpare, sedare; animosum, post peractam longam equitationem, permixtâ quiete, mollibusque alapis recreare, demulcere, ad majora incendere, misturientem demùm sibilo etiam fovere convenit. Quid, si equiti, cum eo equo, res fuerit, quem aliunde mitem bonique moris, paulò tamen hilariorem fecerit diuturnis quies, longiorque in equili mora? Quantum tunc sessoris humeris, lumbis, coxis, torique corpori movetur labor? Quâ patientiâ lascivientis equi hilaritati indulgendum erit? Quâ prudentiâ ejusdem ardor inhibendus? Quâ femorum firmitate, spinæque interim lenitiâ, capræ in modum, saltantis huc & illuc equi motibus erit obsecundandum? Verbo dicam, Equitationis exercitio ac beneficio spissior sanguis attenuatur, emendatur lymphæ nimis lentor, torpentes spiritus animales exsuscitantur, sedantur effreni, functiones instaurantur; quodque curationis cardo est & complementum, distracta aversaque à tristibus, quibus defixa hærebat, cogitationibus, & ad utiliora conversæ mentis pristina redit sua æquabilitas, desuetaque tandiu, hilaritas redditur.

**Q**UO vehatur equo Hypochondriacus, ad morbi sanationem non parùm refert. Currentis equi incessus celerior, præterquàm quòd casui magis est opportunus, pulmonibus etiam & ægræ jam respiratori officeret. Succutientis equi laboriosior gradus & durior, quantùm informandis equis junioribus, quantùm ad fingendum reddendumque sellæ tenacem, equestris artis tyronem, quantùm ad ejusdem tibias decenter collocandas continendasque, ubi præsertim sine *stapedum* fulcimine diutius equitat, utilis est, tantùm, corpus universum molestè quassando, excitandis augendisque ægrotantis doloribus esset accomoda. Nec equitanti ægro non erit molestus Tolutari etiam equi incessus, nisi demisso flexilique admodùm coxendice, humiliùs gradiatur Tolutarius. Qui enim, elatà nimium, nimiumque rigidà incedit coxà, Tolutarius equus, equitem vix minùs lassat vexatque, quàm Succussator. His omnibus incessibus, Gradarii equi gressum, non asinum tamen, non testudineum, à quo plus lassitudinis, quàm medellæ, sperandum ægro esset, sed magnum elatumque anteponimus. Ad hypochondriaci quidem morbi causam extirpandam, non omisiss salutibus, venæ sectionis, Purgantiumque & Emeticorum etiam, sed parçà manu, nec sine delectu & prudentiâ exhibendorum, auxiliis, præscribi solent, quæ sanguinem attenuant funduntque, Medicamina. In usum adhibetur Chalybs &, à Chalybe, Chemicorum solerti labore, variè preparato, desumptorum remediorum, familia numerosissima. Eundem in finem præscribuntur utiliter Aquæ ex ferro minerales, Cortex Peruvianus, multiplicis in medicinâ usûs. Nec pluribus levamini non fuit Opium, Pharmaciæ arte & industria depuratum, correctum; sed quò simplicius sui que similis, eò semper utilis. His præmittuntur aliquando, nonnunquàm interponuntur, temperantium, incidentium, sedantiumque medicamentorum, lenimina, stimuli, solatia. Utinàm nunquam incassum! Quot scilicet ægri, devoratis multiplicum multiforiumque medicaminum farragine ac radio, negatam sibi, licet per tot quæsitam fastidiam, ingemuere sanitatem? Nec enim aut Hydræ huic debellandæ Chemicorum Mars semper sufficit, aut aliquoties Medici spem non fallit cortex peruvianus, aut purgantibus medicamentis quibuscumlibet non exasperatur potius morbus, quàm sedatur, aut aquis mineralibus aliisque diluentibus non aliquando relaxatur nimis viscerum, ventriculique præsertim tonus. Venæ sectio, & quæ temperant tantummodo medicamina, sæpè frustra sunt. Ipsi Opii celer, prodigioque par efficacia, magis, ut plurimum, fugando morbi paroxysmo, quàm causæ radicis extirpandæ opitulatur. Absit tamen ab iis omnibus idcirco abstinendum esse censeamus, quæ ut succellere non rarò, sic Equitationi & possunt, & debent præmitti. Quam nimirum curationem non præstiterunt, aut incœperunt tantùm, auxiliatrices Artis Medicæ manus, supra memorata medicamina, eam absolvet Equitatio. Quid quæritur etenim? Spissior sanguis attenuandus? Id efficiet Equitatio. Variis glandulis obstructionem aut inferentis aut minantis Lymphæ, minuendus lentor? Id operabitur Equitatio. Spirituum motus anormis, ad naturæ leges ordinandus? Ferocientibus Spiritibus frenata, torpentibus stimulis, addet Equitatio. Non alio remedio secretionibus excretionibusque instaurandis, tutius allaboraveris; Non alio auxilio, debilem la-

borantemque stomachum, efficacius juveris; Non aliâ ope Chylum elaboratio-  
rem confeceris; Non alio molimine, nutritiâ lymphâ gravidum, eundem  
humorem, ad cordis anthliam, pulmonisque officinam potentiùs promoveris,  
truseris; Non alio aperiente medicamine, bilem ad intestina molliùs derivave-  
ris, fœces alvi ad naturalem exitum invitaveris, sollicitaveris, urinæ fontes  
abundantiùs referaveris, laxatis cutis spiraculis, noxios humores citiùs uti-  
liùsque diffaveris. Quæ enim tanta excogitari potest succorum depravatio,  
cui emendandæ, stagnatio liquorum, cui dissipandæ, glandularum obstructio,  
cui destruendæ, digerentium, fecernentium, excernentiumve organorum natu-  
ralis impotentia, cui discutiendæ & medicandæ pares non sint, singulis diebus,  
uno tenore & sub dio ingeminatæ, tot succulsum Myriades. Huc accedit, quod  
minimo labore nulloque virium dispendio, concussâ totâ corporis machinâ,  
firmatisque & roboratis omnibus, vel minimis, minimorum vasorum, fibrillâ,  
quidquid sanguinis, celeriore paulò factâ respiratione, in pulmonibus sub-  
actum, tritum, imminutumque fuerit, totum illud, acceleratis tum cordis  
tum arteriarum ictibus & pressu, ad extrema corporis, inde, si non pari, at  
majori quam antea celeritate rediturum, æqualiter constanterque diffundat-  
ur. Peractâ igitur Equitatione sanguis fit fluidior. Qui autem ab eo secernuntur  
spiritus animales, non possunt, redintegratæ sanguinis texturæ, non fieri partici-  
pes. Interea, materiæ perspirabilis effluvium liberiore cursu ad poros ferri,  
patentioribusque cutis spiraculis efflari, quis non intelligit? Pendendum ab  
Equitatione tot bonorum in partem venit Aer. Qui quidem purior, identidem-  
que renovatus, quoties equitanti allabitur, toties corporis villos stimulat,  
novas in contractiones sollicitat, suoque in pulmones lapsu, sanguinem aut  
subit, aut certè in vasorum pulmonalium parietes impingens, eorum fibris  
vigorem, sanguini postmodum, ab iisdem, reddendum, importat. Equitationis  
demum utilitatibus coronatam imponit delinitæ amœnâ ruris varietate mentis,  
eiusdemque à mœstitiâ distractæ, & circum alia necessariò occupatæ, ad tranquill-  
itatem lætitiæque revocatio. Dum enim regendo equo, corporique in conve-  
nienti positurâ continendo, prospicere cogitur equitans Hypochondriacus, & aliàs  
rivi campos fecundantis limpiditate & murmure oblectatur, stupensque ad luxu-  
riantis terræ fertilitatem, hinc duri agricolæ laborem pariter ac mercedem, spissas  
segetes, ibi gravidas uvis vites, industriad vinitoris, Autumnique spem circum-  
spicit, lustratque oculis quicquid ambulantium offerunt oblectationi varia tel-  
luris modò in colles assurgentis, modò in planitiem subsidentis fecunditas &  
multijuges divitiæ, abeunt paulatim in auras curæ, sollicitudo, mœror, morbi  
cujuslibet, vel vera, vel imaginaria, possessio; iisque omnibus dicto vale gra-  
tissimo, quantum, eundo, decedit morbo virium, tantum, corpori sanitatis,  
equitando, accedit.

## V.

**E**QUITATIONEM igitur, hypochondriaco malo laborantibus, peruti-  
lem censemus, & asserimus. In eâ tamen, ut & in optimis quibuscumque  
rebus, modus sit, necessum est. Nec enim, dolentem jam, Hypochondriacum  
Succussatoris caballi tormento cruciandum judicamus; aut eundem, in ipso  
morbi paroxysmo, difficulter, ut sæpe fit, spirantem, laxatis habenis & ra-  
pidè



pidè currentis equi, violentissimis, hypochondriacoque asthma longè pejoribus, insultibus, tradimus suffocandum. Insaniret prorsus, carnificinamque faceret, non medicinam, si quis, hunc in modum sèviante morbo, sèvum adeò exercitationis genus probaret, suaderetve. Remedii cuiusvis, efficaciam magna pars, in dandi opportunitate, posita est. Quis imminente aut præsente, malignæ febris individuo, ut plurimum, comite, delirio, vigiliarum pertinacitatem opio infringere tentaverit? Quis, fidum adeo intermittentium febrium domitorem, corticem peruvianum, in ipsa febris, vel tertianæ, accessione, ægrotanti porrexerit, nili & morbi naturæ, & adhibendæ morbo, hujus medicinæ, plane ignarus? Hæc tamen tempore exhibita & loco, mirum, quàm efficaciter operabuntur. Idem de Equitationis remedio asserueris. Suâ quidem naturâ utilis est, hypochondriacis, quam aliis quibusdam, morbis utilior, delectu & opportunitate, sit utilissima. Gradatio primum utatur equo, pedetentimque progrediatur, qui, nonnisi gradatim, sanitatis propositum finem sperare debet se assequuturum Hypochondriacus. Et primis quidem diebus intrâ mediocris itineris limites consistat, pro tempore, remedii successus, virium augmento, deinceps protelandis. Erit scilicet ubi firmatis in dies, Equitationis beneficio, omnibus corporis partibus, remedii dosim augere, mutatâque in meliùs valetudine, equum etiam, aut saltem equi incessum, mutare, & licebit, & oportebit. Relicto igitur Gradatio equo, Tolutarium conscendere, convalescentis ægri è re fuerit. Quò nimirum, non auctâ lassitudine, longius progrediatur. Hac arte, quos jam moverit, exituique præparaverit humores, remissior Equitatio, eos Tolutarii equi celerior incessus faciliùs expellet. Sano tandem morbo, receptisque nervis, nihil impediet quominus, currente equo, aliquoties vehatur Hypochondriacus. Nec est quòd elocandis luxandisque artubus obnoxiam esse Equitationem clamites. Illud si quidem aut fortunæ & casui, aut equitantis imperitiæ, non Equitationi tribuendum. At, inquires, Hippocratis testimonio, nimium calefacit, exsiccat atque extenuat Equitatio. Sic est, sed celerior, sed violentior, sed diuturnior; quam, nedum suadeamus, improbamus. Frustrâ objiceret Thoraci pulmonibusque insensam esse Equitationem, quæ pulmones roborat, non debilitat, & quam, vel ipsis Phthisicis tanto adjumento esse experienciâ constat, ut eam Antipthisici remediû nomine insignire; præstantes, in arte medicâ, viri non dubitaverint. Non æquius, lædi Equitationis maleficio oculos, idcirco affirmares, quòd, qui equitant, quò longius progrediuntur, eò magis lacrymantur. Illud enim nec omnibus, nec semper, contingit, & si quando contingat, finitâ Equitatione statim cessat, ac proinde, naturali oculorum debilitati, crescentique, pro equi celeritatè, adversi venti frigiditatè & impetui, rectiùs, quàm, saluberrimæ aliàs exercitationi, imputandum est. Nec quicquam etiam arguerit utilissimi hujus remedii osor & detractor, ab eo, renibus, maxima imminere incommoda, huicque suæ calumniæ firmandæ allegaverit, alios, Equitatione, urinæ ardore contraxisse, sanguinem minxisse alios, hunc lapillos per urinæ vias emisisse, illum, ortis inde, Renum ac Vesicæ pessimis affectibus vexatum fuisse. Si quem fortè ad efficiendum vesicæ, ureterum, renumve incolam & tortorem lapillum, sollicitavit Equitatio, est illi quòd utilissimam hanc exercitationem laudet, beneficii memor, non quòd, ingratus, criminetur. Aliundè verò, non Calculosis, non Nephritide aut quibuslibet aliis vesicæ morbis la-

boranti ægro, sed hypochondriaco homini Equitationem præscribimus. Ac esto, instabilis, nullis labore æger morbis sive innatis, sive adventitiis, quibus, ab imperandâ Equitatione, deterri possit medicus; quâ tamen autoritate illud à languente & meticulofo Hypochondriaco extorquebis, ut laboriosâ, & nonnunquam periculosa exercitatiõni vacare in animum sibi inducat? Quasi verò à renuentis aut annuentis ægri arbitrio, remediij cujuslibet necessitas, utilitasve penderet. Præterea, ut docili, & rationis imperiis auscultanti ægro imperare ad medici dignitatem pertinet, sic eidem, in ipsâ affectûs hypochondriaci, mentem æque ac corpus perturbantis, accessione, difficili & moroso cedere, molliaque interim fandi suadendique tempora explorare, medici prudentiæ est, & humanitatis. Suade modò, curationis dimidium habebis, jube deinceps ægrum sperare sanitatem confidentissimè, nec te vana spes, nec ægrum infida ludet promissio. Viden quàm athletico habitu gaudeant, quâ femorum lumborumque firmitudine incedant, quàm latis polleant humeris, quàm carnosò niteant corpore, quo vigeant stomacho, quàm probè, ingesta alimenta digerant & egerant, quàm illibatâ demum ii fruuntur valetudine, quos, ad varias cœli mutationes, variumque vitæ genus, induravit, suscepta, teneris ab unguibus, Equitatio? Cum igitur tot bona accersat foveatque Equitatio, cum eandem hypochondriaci morbi, sanandis symptomatis, causæ abolendæ, præcavendoque reditui, allatis supra argumentis, aptissimam esse probaverimus, huicque asserendæ veritati optimorum medicorum vox unanimis, & quolibet ratiocinio certior, quotidiana experientia suffragentur, merito concludimus.

*Ergo Hypochondriaci morbi remedium, Equitatio,*

### DOMINI DOCTORES DISPUTATURI.

*M. David Vasse.*

*M. Philippus Davier de Bre-  
ville, Doctoris Hispaniarum  
Regiæ Medicus perpetuo  
Ordinarius.*

*M. Jacobus-Antonius Millet;*

*M. Andreas-Josephus Seron.*

*M. Petrus Maloet, Consiliarius  
& Medicus Regis ordinarius,  
necnon Domus Regiæ Invali-  
dorum Ducum & Militum;  
Academiæ Scientiarum Regiæ  
Socius.*

*M. Michael Peaget;*

*M. Thomas-Renatus Gafnier.*

*M. Guillelmus de Magny.*

*M. Nicolaus le Tellier.*

Proponēbat Parisiis, JOANNES-JACOBUS BELLETESTE;  
Parisiinus, Baccalaureus Medicus, A. R. S. H. 1737,  
à sextâ ad meridiem,